

Our dal quartet es dvantà ün sextet

L'ultim dals quatter concerts dal Quartet Stradivari ha gnü lö illa baselgia San Geer a Scuol. Cun ün'ouura da Mozart ed üna da Brahms han ils musicists inchantà e muossà lur abiltà musicala sorprendenta.

l' cudeschin da program intuna la cellista Maja Weber lur buna relaziun cun l'Engiadina e loda las bellezzas da la natüra illa regiun. «Nus gnin adüna bivgnantats cordialmaing ed ils ospis in hotels e restaurants adattan nossas producziuns musicalas cun lur sportas culinaricas in möd cha tuot as preschainta sco evenimaint sorprendent. Cun nos program da quist on lain nus tour il public sün ün viadi da 300 ons istorgia musicala», ha quintà Maja Weber. Ils quatter concerts han gnü lö illa baselgia a Sent, sül Chastè da Tarasp, sül Institut Otalpin a Ftan ed illa baselgia a Scuol. Tuots quatter concerts d'eiran vendüts oura ed auditoras ed audituors han giodü producziuns musicalas in perfecziun.

Ouuras da Mozart e Brahms a Scuol

Il Quartet Stradivari s'ha preschantà in sonda vers saira illa baselgia San Geer a Scuol cun Xiaoming Wang, violina, Maya Kadosh, violina, Lech Antonio Uszynski, viola, e cun Maja Weber, violoncello. Els quatter fuorman il quartet Stradivari e sun gnüts accompagnats a Scuol da Sebastian Bohren, viola e da David Pia, violoncello, ad ün sextet. Üna constellaziun unica cun musicistas e musicists da renom mundial. Sco prüm han giodü ils preschaints üna cumposiziun da Wolfgang Amadeus Mozart (1756–1791), chi'd es mort fingià cun 35 ons, in trais parts: Allegro maestoso, andante e presto. La seguonda part dal concert cun ün'ouura da Johannes Brahms (1833–1897) cullas

parts duos jadas allegro non troppo, poco adagio e poco allegro.

Duos ouuras tuottafat differentas

Intant cha la musica da Mozart s'ha preschantada in möd fich melodiusa, paschaivla e per part ün pa melancolica s'ha müdà il stil musical cun l'ouura da Brahms. Quella d'eira dominada da parts leivmaing dissonantas e na sco unità dals instrumaints dimpersè cun per part dumondas e respostas

dals divers instrumaints. Cun quai cha mincha register d'instrumaints d'eira preschaint culla fuormaziun da sextet in möd dubel d'eiran scrittas las ouuras uschè cha minchün vaiva sia aigna vusch. Per exaimpel pro'ls duos cellos sunaiva Weber plüchöntsch las parts solisticas e Pia las parts dal bass.

Tuots quatter concerts in Engiadina Bassa d'eiran cumbinats cun ün aperitiv e sün giavüsch cun üna tschaina. L'auditori preschaint ha muossà seis

plachair vi dal concert cun grond applaus.

Ün pèr detagls dals Stradivaris

Il Quartet Stradivari es gnü fundà dal 2007 ed ha raggiunt sün tuot il muond ün fich bun renom. Els vegnan clomats in metropolis sün tuot il muond e sunan var 60 concerts l'on. Fich retscharchadas sun las Festas Stradivari ingio ch'els sun adüna in stret contact cun lur public. In tuot lur vita musica-

la cun grond success sun els restats modests e simpatics. Il quartet dispuona d'ün repertori fich grond e larg, els as concentreschan però impustüt a lur ciclus ch'els müdan solitamaing mincha stagium. Il focusar sün ün ciclus pussibiltescha üna gronda intensità ingio cha'ls cumponists cun lur differentas fatschettas stan i'l center. Lur böt es da pudair spordscher ün optimum da qualità e da's preschantar sco unità. (fmr/bcs)



Il sextet da Stradivari in acziun ed in plaina concentraziun.

fotografia: Benedict Stecher